

CHINESE-JAPANESE LIBRARY  
HARVARD-YENCHING INSTITUTE  
AT HARVARD UNIVERSITY  
APR 15 1952

06

T5295 /714

唐丞相曲江張先生文集卷之十二

哈佛大學哈佛燕京  
圖書館珍藏印

頌碑銘

靳公遺愛銘

忠憲公裴公碑銘

徐文公神道碑

牛公碑銘

竇府君墓碑銘

呂府君碑銘

李公碑銘

李府君碑銘

徐穉碣銘

辰州瀘溪令趙公碣銘

故襄州刺史靳公遺愛銘并序

江漢間州以十數而襄陽爲大舊多三輔之豪今則一都之會故在晉稱南雍在楚爲北津厥繇冗雜亦

云難理而前此領郡鮮能安人或寬或猛或拘或抗  
跡多弗類俗亦弗寧是以天子念與我之理而公受  
煩卿之寄矣公名恒字子濟其先某人也祖帥幽州  
長史父禮庭奉天討監察御史世不苟合義在難進  
雖無克量之位而有積善之烈矣公性持重有器望  
即溫而厲居敬而簡度量可以轉物德義可以服人  
而先王遺言率由好學君子行道必本忠恕浚源水  
潔厲翼雲翔故一舉爲拾遺已有遠致三入爲御史  
儼然正色當時知音謂且大用而尚書理本郎官選  
才亟踐諸曹克壓群議及再典大郡遂佐益州攝御

史丞都督西南軍事原軫超將豈惟上德翁歸中立  
實兼文武先是兵連蠻獫歲轉軍儲優我公私費以  
巨億公乃急其所病思有以易之建大田於雲南罷  
饋糧於邑蜀向之踰重阻冒毒瘴負擔以踣斃垂耳  
於剽掠者每十有五六及公底績盡境賴全至於是  
邦也政實有素今也惟行不違其方以索其極莫不  
教之誨之優之柔之從者善之否則威之先德後刑  
端本肇末物知所勸事則有經率訓者衆多變薄爲  
厚感惠者深遠旣和且均夫然後人斯耻格庭少諍  
訟叅佐閑拱屬城晏如其始也一年而政成其終也

三年而頌興愛之如父母畏之如神明開元十二年  
以理跡尤異廉使上達天子嘉之稍遷陝州刺史暨  
解印去郡攀車盈途或願借畱無緣而人吏遮道或  
瞻望弗及而老幼啼呼如是者五里已終朝十日乃  
出界而皆有言曰捨我何之及聞公之喪哀可知矣  
市爲之罷春以之輟惠愛之結深古今之感一蓋爲  
仁由已而遺德在人者其若是乎郡中士大夫與門  
生故吏聚族而議譔德是以刻石立紀彼銅陽之陋  
墮淚成碑此峴山之績銘曰

英英斬公宣哲秉彝爲我髦士作人元龜倜儻大節  
磊落瑰詞人亦有言天嘗資之御史直繩郎官高選  
動必兼遂能皆再踐糾過邦慝彌綸事典遂及我人  
化流樊沔激厲素風抑撈善政約紀爲法急人所病  
物故推誠事匪忘敬感彼于下仁明在詠舉德不鮮  
涉道載深穆然清風莫其遺音繫公旣沒厥跡可尋  
勒石是圖以慰昨心

大唐金紫光祿大夫行侍中兼吏部尚書弘  
文館學士贈太師正平忠憲公裴公碑銘并

序

夫道遵常習故益人拘於凡也得精忘麓是天縱於

聖也方聖上之拔太師也豈藉譽於朝廷哉徑取才於無跡懸收功於未朕而終致大用克成休勲使祖虛名者見西子而憎貌工橫議者聞魯連而杜口乃知古所則哲雖帝其難今之得人遇聖爲易能九則主之鑒不負直賢之實者其在正平忠憲公乎

公諱光庭字連城河東聞喜人也伯翳之後與秦同姓始封于裴因邑命氏在魏晉之際爲人物之傑與瑯琊王氏相敵時人謂之八裴八王自茲厥後奕代更盛大王父定周大將軍馮翊太守瑯琊公大父仁隋光祿大夫追贈持節原州都督天之旣厭隋德矣

見危致命不亦難乎謚之曰忠憲春秋之義也父行儉禮部尚書兼定襄道行軍大總管聞喜縣公贈大尉時或有奸王命矣禁暴安人不謂重乎謚之曰獻尊名之典也公卽獻公之第七子降神元和含光不曜越在初歲已有老成雖遠大是圖而近識莫誤學探帝載何事小名業綜人倫豈務一善弱歲居太尉獻公喪幼以孝聞尋補引文館學生神龍初明經擢第授家令寺丞轉太常丞加朝散大夫景龍中以親累外轉尋入爲陝王友改右衛郎將丁晉國大夫人憂柴毀骨立殆至滅性服免起爲貝州別駕未之就

也復除右衛郎將無何遷率府中郎嗟乎有其道而無其用不可行也得其時而不得其志亦不可行也公負經綸之器韜王霸之畧自委泊外臺棲遲下位出入從事十數年間坦然而自若者何哉蓋知才有所必伸命有所必與非苟而已開元中聖上思光祿之休烈蓋大尉之元勳是必象賢其將大授特拜司門郎中轉兵部仙臺之文始應列宿鴻漸之羽可用爲儀遷鴻臚少卿以觀其能也是歲天子有事于岱宗諸侯會朝于行在執籩豆者不限於中外獻賂賚者亦勤於駿奔莫不來享無有遠近而執政者以公

代曉邊事職在行人且曰夷狄豺狼黷盟阻德我今有事戎或生心我張吾師有備無患若何公曰不可夫封禪者所以告成功也觀兵者所以威逆命也云亭苗扈非一時之事也受脤執燔非三代之禮也天方佑我光啓舊服憬彼獯鬻能違天乎無庸勦人可  
以謀告從之秋九月突厥果使其相執失頡利發與其介阿史德曠泥熟來朝公之謀也東封還遷兵部侍郎圻父之職夏卿之亞存而舉者悉以舉之公於是考遺訓補缺典飾蒐苗獮狩之禮詳征稅簡稽之賦頒九畿之政設九伐之刑以練國容以精軍實邊

鄙不聳帝用嘉之既而拜中書侍郎同中書門下平  
章事兼御史大夫王言其出需乎人有歸也天憲惟  
明肅乎人知禁也尋加銀青光祿大夫換黃門侍郎  
俄遷侍中兼吏部尚書弘文館學士摠百揆之樞轄  
酌九流之淵奧叶文執之殷度人神之和水火象鼎  
其惟實鍊山川出雲用作霖雨時哉之會無得稱焉  
先是大化之行務以玄默遵夫簡易舊章在而不議  
吏道雜以多端公於是求革故之實契隨時之義作  
執秩以平之設循資以定之謹權衡以選之考殿最  
以叅之姦回無所措其邪躄踏不能介其量多士動

媚于人者必好其威福賢於事者必羞其謗政公知  
其然則以直道匪躬之故忠莫厚矣禮爲人子春秋  
以致享義於人臣夙夜以從命公知其然則以時告  
如在之敬孝莫重焉夫以衡石之任陶鈞之力莫不  
責成於下吏求備於一人以故舞文雷同疑獄歲構  
恬而不改浸以成風公知其然則以信察御物之惠  
仁莫加焉其行已奉公皆此類也嘗所著述率于箴  
規以爲惇叙九族本枝百代王者之盛也而義不可  
以無訓作瑤山往記維城前軌以諷之微而彰志而  
晦聖人之舉也道不可以虛行作續春秋自戰國迄

于周隋以統之臣子之義也天人之際備矣非洽聞  
通理其孰能與於此乎宜其存無辜人歿有遺愛嗣  
子稔京兆府司錄事參軍孝實克家動必中禮丕承  
後命紆天鑒而增華敢跡前修琢豐碑而不朽銘曰  
益作舜虞鍼分晉土慶流八族德盛三祖瑯琊象賢  
懷文佩武光祿忠烈殺身報主尚書出將恢我王畧  
文教內敷武功外鏖緇衣之弊惟公繼作用晦而明  
處豐思約鴻臚好謀夏卿稱職代天流化佐皇立極  
納于憲府好是正直乃宅冢司謀猷允塞盡瘁事國  
夙夜在公居無闕政歿有餘忠天子命我頌德銘功

日月有旣令聞無窮

大唐故光祿大夫右散騎常侍集賢院學士  
贈太子少保東海徐文公神道碑并序

夫物之所宗也莫善乎德行道之以明也莫先乎文  
學人倫以具體爲難世業以濟美爲貴有能兼之者  
其東海公乎公諱堅字某其先東海郊人永嘉之後  
仕業南國因家吳興焉隋氏平陳徙族入雍今爲馮  
翊人也原其伯翳于水土實佐文命偃行仁義大啓  
徐方因國保姓克昌厥後逮乎漢魏間出仁賢十二  
代祖晉江州刺史順陽簡寧侯至五代祖梁直閣將



軍慈源侯整整生陳始安太守綜綜生隋延州臨  
令方貴方貴生唐果州刺史孝德生唐西臺舍人贈  
禮部尚書齊暉出入六朝載祀數百文武冠冕存歿  
光靈訓子克家謀孫必復賢風儒行世有其人公即  
尚書府君之元子也生而濬發默識經藝粵自童齡  
則美文言時先府君爲沛王侍讀公之岐嶷聲振平  
臺王聞而延佇與之談議授簡能賦博奕惟賢門客  
府寮深所厭服奄遭不造十四而孤祖母金城郡君  
姜太夫人念其聰異誨以志學公遂克勉詣心精微  
磅礴九流激昂三變景倩幼露實賴愍孫令伯大成

抑由祖母上元中遭姜太夫人喪哀幾滅性制則  
禮有感斯絕無聲常淚服闋州辟秀才其年登科解  
巾補汾州叅軍部送邊備至于定襄軍使王本立素  
重公才署爲管記書奏謀算悉以咨之坐耀鋒鋞未  
嘗肯縻尋而換雲陽尉萬年坐簿親累出爲揚府工  
曹振鱗將搏載躍京轂垂翼遠逝有聲東南俄遷太  
子文學時秘閣群籍大抵訛謬有勅召學士詳定公  
實在焉爲之刊緝卷盈二萬時輩絕倒伏其博達尋  
與李嵩等撰三教珠英書成奏御拜司封員外尋加  
朝散大夫即拜郎中稍遷給事中以公代及文史詞

不失舊日雖居瑣闥尚比纏牽遂除中書舍人君子曰  
舜之官人也二年勅公修則天聖后實錄及文集等  
絕筆中宗嘉之璽書敦慰賜爵慈源縣子賚物五百  
段旌良史也遷刑部侍郎加秩銀青光祿大夫轉禮  
部侍郎兼判戶部公久踐朝廷累登省閣舊章必練  
即事無疑雅不煩文深得大體雲臺高議以此歸之  
進封縣伯食邑五百戶兼昭文館學士受詔與天竺  
僧菩提流至譯寶積經及柳冲等同修姓氏系錄二  
教寶直萬族有倫亟見成矣太平公主內秉國權駙  
馬武攸暨外收人望命公至第拒而不行惡夫佞也

景雲初今上夷亂主幽東朝官相四員特難其選二  
以宰臣兼領一則天故人任良兩官實在公矣遂  
除右庶子兼崇文館學士修史如故進爵東海郡公  
食邑二千戶遷右散騎常侍以本官兼黃門侍郎尋  
而即真祿賜同三品爵崇五等道茂兩官利君謀身  
舉代皆譽又以刪定格令承恩進爵二等公請又授  
叔父齊莊帝用懷之遂封莊爲長城縣子天下義士  
莫不激昂焉侍中岑羲公之姻婭與其聯事深自危  
懼求典閑司以遠祗悔遂改太子詹事迨羲禍敗地  
絕嫌疑先是不交定王及此不昵岑氏見炎莫附思

患預防信達人也復以親累出爲絳州歷永新隸衢  
四郡山川分位楚夏異齊公政不易宜教以因俗德  
化歸厚人共由之開元中會同京師遷秘書監無何  
轉國子祭酒皇帝稽古崇訓開堂集儒以公才學元  
長命登首席遂令集賢殿修撰又除右常侍以公爲  
學士副丞相燕公知院事綢繆顧問日月獻納恩渥  
尤及少有其比上將柴于岱宗詔公草其儀注定禋  
祀之位廣配類之儀博文約禮或公或革言出而人  
伏事立而天從時議遠矣及禮畢承恩特加光祿大  
夫時置十銓公在分掌程不愆素且無遺才公既替

相謨猷從容調議大鍾必諫溫樹不言啓沃盡規實  
致君於堯舜死生有命空比德於老彭享年若干以  
開元十七年龍集己巳五月丁酉薨于長安頒政里  
之私第聖人震悼君子稱嗟翌日有詔褒贈太子少  
保贈物若干段粟若干石特遣中使內侍尹鳳祥弔  
祭而別賜布帛若干端疋俾鴻臚少卿元復監護葬  
事官給鼓吹儀仗太常考行曰文君子曰仁而愛人  
敏而好學家有榮業紹其弓冶國有大事修其典章  
謚之曰文不亦宜乎其年冬甲子與夫人故南陽郡  
夫人合葬于萬年縣之少陵原先塋禮也公寬裕有

禮溫良能斷智出于象外樞得其環中行之積也厚  
名之立也大故起自黃綬累踐赤墀五省推高連州  
得最事將時並位與才偕莫之天闕也至於升堂入  
室探微覩奧動有禮樂之運言有雅頌之聲是惟無  
作作則萬物和而入音備矣蓋嘗注史記修晉書續  
文選大隱傳及有文集三十卷皆資於故實博於遺  
訓古今通變河漢共高或藏名山或升天府豐豐然  
各得其所嗚呼文仲歿而其言立子產終而遺愛存  
公則備焉宜受戩穀保艾厥後代代守之有子曰峻  
嶠岷等才以雅著孝以特聞學茂高曾之科旨詞雄

祖考之風格備歷清貫皆立能名三賢德聲方賈氏  
無愧累葉儒訓與班門孰多咸瞿瞿如皇皇如昊天  
不追終身積痛求獲撰實勒諸墳道僕從述者之後  
敬而伸之乃爲銘曰

舜命益虞疇功帝俞偃行文教代集通儒光華鼎閱  
出入秦吳門多長者君其最乎

右其一

曾是好學果行洵美日就麟成鳳積鵬起黃綬覆篲  
朱門方軌官籍正人朝稱良史

右其二

世身卷之七  
三入承明五遷外郡道有出處心齊喜愠帝思啓沃  
國常師訓屢獻箴規偏承顧問

右其三

居常有異博而無惑綿蕝孫通銓衡叔則爲龜爲鏡  
立言立德胡不子遺左右王國

右其四

悼興冕旒哀結衣簪官供羽仗士惜人琴已矣終古  
平生德音松枝掛劍碑字生金

右其五

大唐贈使持節涇州諸軍事涇州刺史牛公

碑銘并序

夫志道莫先於無欲福善莫大於有後始而悔跡終  
不近名非道德之合歟生我勞臣立于遠績非善慶  
所致歟所謂伊人其在牛公者矣公諱某字某先子  
姓實始殷後有牛父者則宋之大夫胤裔蕃衍人物  
更盛邽爲護羗校尉崇爲隴西主簿遂家隴上是稱  
冠族其後因官安定爰處鶡觚今爲郡人亦旣重代  
矣公之族祖有竒章公者隋室宗臣風流篤厚典章  
損益百代可知天下稱之地靈斯在大父通秉志高  
尚守道不携當時交辟辭疾不起父會弱齡早代有

才無祿公夙構閔凶終鮮兄弟性且純至孝思罔極  
幼以子立志不違邦與道爲徒求仁自我不屑軒冕  
考槃丘園雖云屢空晏如也六郡自古五方雜錯負  
力怙利尚氣好武人庶相放風俗不純及公冲和其  
返真樸外以義行格物內以默致順神不飾智以驚  
愚不弃同而即異有恒其德無斁於人鄰落爲之變  
風狼戾以之率化公旣浮雲不義介石惟一或勸之  
仕但笑而不言飛鴻冥冥胡可量也開元六年隨子  
西征以就色養春秋高矣道茂年衰魂氣其歸賢達  
共盡越五月寢疾終於伏羗之官舍時年七十有六

冬十一月歸葬于北原夫人同郡王氏不享偕老先  
是即代母儀婦德宋子齊姜自歸于我宜爾家室不  
有配德曷生此子有子仙客爲國之良用商君耕戰  
之圖修文罔羗胡之具出言可復所計而然邊扞長  
城主恩前席且以子貴之義有加父存之禮玄澤下  
建素風激揚陰德所流大福斯至十八年有詔贈涇  
州長史二十二年冬且有後命贈使持節涇州諸軍  
事涇州刺史夫人追封太原郡夫人於戲存而累仁  
沒有餘烈福自昭於玄體道非異於異時及其影響  
同符寵光如答雖松楸已拱而章紱載華死有可作

無異會稽之節生苟爲耻安用鴈門之肉貴與不貴  
可不然乎嗣子銀青光祿大夫太僕卿判梁州持節  
河西節度使兼隴右郡牧都使支度營田使隴右採  
訪處置使攝御史大夫隴西縣開國子仙客叩心知  
遠昊天莫逮以爲先美蓋闕後嗣有媿且澤漏幽壤  
得不銘恩名典本州豈徒錫羨而已銘曰

隴上多塚山西好武使君貞獨幼不斯取惟道爲徒  
與代立短善有餘慶風亦變古不學而知不行而至  
跡有相混名無自異出入百年終始一意福流于後  
神明其事行止於身用存玄體厥子嘉績中朝緝禮

印迴壠墜門重旌繁逸人之墓今同郡邸

故河南少尹竇府君墓碑銘并序

序曰正其身君子所以慎德敏於行吉人所以寡辭  
或道之或處之是亦正命命之將行利有攸往則行  
不家至而人勸言不面命而事濟不爲跡而實以阜  
蕃不沽名而聲以遠駭夫如是者存乎其人故河南  
少尹竇公盖有之矣公諱某扶風平陵人自後魏大  
將軍侍中永富公至烈考瀛州刺史贈刑部尚書莘  
國公六葉矣皆增華鄉族見重公朝四國于蕃四方  
于宣龍旂成祀六轡耳耳公所謂盛德必祀承簡子

之始大積善餘慶是僖伯之有後故生則靈知長而  
純固既白而受采亦黃以通中天假不器之性人服  
自然之理而况於文雅緣飾志業孔修引伸足以長  
人動用足以利物既學從政其歸簡易形有方殊道  
以一貫人致一意而已我乃萬目盡張故其始也以  
明經上第授彭州叅軍事詢謀郡將器異甚厚所遇  
森然其言固矣如山之爲始於覆簣如江之道守終以  
方舟於是累遷至于薛王友贊善大夫燕王築館以  
待士漢儲立苑以招賓當其推擇莫匪賢俊議者惟  
允而公在焉然由韞匱隋和十城空其價蹇踟驥駟

千里未之騁及其用也再入尚書郎遂為洛陽令三  
臺雅望一時精選舊童資以彌綸利器呈於盤錯出  
宰百里實推三河其賦政則必反於其身亦既誠信  
被之於物是為惠懷故雖二州餘弊儉巧而難理五  
郡尤劇權顧而多姦莫不可使由之令自求之善處  
中於下鞫能合遊刃至於釐舉風俗之謬裁正人倫  
之經務勸衣食之原調均經賦之事本為已任無間  
人言故視事踰四年通而不倦道德在百姓久而益  
彰非夫明允宣和優柔博約自我之不忒為人之攸  
墜亦曷由臻茲厥有洛陽所謂賢令者則周紆王渙



孔明祝良公實績之誰其似之屬天子建中都營新  
邑資爾亞尹俾其董司朝選其人公首斯舉以故稍  
選河中少尹且有後命廢府而復遷河南焉以公之  
歸從人之望官則改次政無易方以佐理王都以表  
則天下而年不克祚位不光寵遇暴疾而卒悲夫是  
歲有唐開元之九載春秋五十有六公以孝友爲體  
一變而迪忠信以明恕爲用再變而致循良故所行  
無擇所事無巧有恒其德終且溫溫不伐其功昭然  
赫赫所以遺愛固結必在何武之去稱誦斯深惟恐  
子產之死已而神道歎而不福物情喪其所賴人之

不幸今也云亡及喪之西歸則人吏致哀道路相屬  
得人心如此冬十一月葬于北原後之人或者將遊  
於斯歎於斯彼其與歸我乃不朽矣其子八人長曰  
某次曰某家有六岳之德里以高陽之名夙構閔凶  
能哀傷以殆滅匪革其道懼功伐之不傳俾予爲文  
以敘孝子之志銘曰

綿絲瓜瓞少康遺烈靈則長兮莫莫葛藟王孫承祀  
世其昌兮而我實績如金如玉載揚光兮咨亞尹之  
德柔嘉惟則揚令聞兮惟別駕之功邦國不空眈胥  
詠兮不競不綽不剛不柔以成政兮德之攸好神之

所勞實降祥兮有美無度曷不肯昨今則亡兮我著  
名節俾無泯滅惠無疆兮

唐贈慶王友東平呂府君碑銘并序

夫官雖序賢志道者不常有位才雖屈命福善者未  
必無後子夏文學之達以爲富貴在天下公決曹之  
平則云子孫由我蓋不享當代生數猶竒流慶後人  
玄體乃用亨之會也蓋有原焉

公諱處貞字虔求東平人曾祖北齊幽州長史府君  
諱贇祖隋貫州中正府君諱伽考渝州清池令府君  
諱師昔伯夷佐唐實典三禮四嶽佐禹用平九州虞

夏以功而見封中呂因邑而命氏惟時厥後并代不  
承公正性之有自來直道之不充詘嘉勇退之又德  
避近名之未然越在弱齡棲遲事外用光本於藏曜  
履行期於滅迹不遠於仁行之斯至不苟於義方之  
自止佐一郡而即安居九夷而匪陋始不然者公下  
椽於東裔載起家授玄州司戶叅軍晏如也言旋初  
服遂從所好外物之槩不雜於風塵遠子之言惟聞  
於詩禮所謂溫良淑慎無競伊人者歟天冊二年夏  
四月遇疾終于家春秋五十有二開元十四年冬十  
一月塋于邑城西南四里原夫人北地傅氏祔焉夫

果於立誠靜以俟命力不足者則不疲運不至者則  
不憂物情之難及我而易是以名利衆之所欲也公  
則澹泊之德義人之所鮮也亦克蹈籍之如此而神  
不勞福不流未之有也有四子長曰玄知今左威衛  
司戈次曰玄悟中散大夫使持節鄜州刺史次曰玄  
智左威衛執戟次曰玄爽左衛長上惟玄悟至大官  
此其教忠有舊服義無斃好爵是與餘慶所貽入爲  
王門之長出居邦伯之列屬恩推子貴名彰身後事  
有光於冥漠令德乃發於馨香三命爲大夫百代稱  
先子孝理所賜邦族爲榮開元十七年有制贈公慶

王友夫人贈河間郡君其人之符行至是所驗惟神之  
鑒謂之不欺公之女孫曰東平魏夫人冠軍大將軍  
右監門衛大將軍渤海高公之夫人鄜州刺史之女  
也冰玉相輝椒蘭同馥由福履於君子與嘉會於善  
人齊姜子歸魚軒曄以照路鄜時之徃熊戟殷其若  
雷有車服而始大履霜露而追遠於戲食于舊德無  
忝爾之奉先樹之休聲有以見其歸美銘曰

赫赫我祖惟師尚父泱泱大風悠悠終古施于胤裔  
憲是文武我美其濟我則斯取雖匪高位亦惟碩德  
我王之友彼夫之特旣貞且亮宜語而默投足皆安

終身不忒我積善以福後人朐嚮家慶煒煌宗姻  
瞻彼松檟錫之絲綸今也追節實爲先臣先臣伊何  
宜其有後志之所尚義無所苟身雖旣沒名豈虛受  
立德在茲亦云不朽

故果州長史李公碑銘并序

公諱某字某趙郡房子人其先自段干木至栢仁侯  
皆以醇德茂功奮于上世始於藩魏終而將趙其名  
不殞遂濟于今五代祖後魏中書侍郎始封懿公璨  
璨生徐州刺史始封慎公元茂元茂生趙郡太守君  
諱鳳昇鳳昇生駙馬都尉直閣將軍府君諱道宗道

宗生齊尚書右外兵部郎中府君諱山壽公即郎中  
府君之子仍世致美在邦攸宜故我公稟靈中和履  
道元吉以學則探其奧旨見聖人之心以行則踐其  
嘉言合君子之度以故動爲人譽名乃日宣義府孔  
修德輿云遠固未可量也隋大業中舉孝廉泊唐興  
調棣州司戶叅軍凡遷磁相二州總管府戶曹叅軍  
宜州錄事叅軍莫不事人以直反身於誠處卑能安  
敬長則順故光輔郡將周爰我咨自州祖州或嘯或  
諾旣而遷金鄉晉陵二縣令精誠以庀事善教以長  
人四封用孚三英以粲破蒲與密獨何有焉以課最

遷歸州治中郢州司馬加朝散大夫行果州長史盤桓叅佐未復公侯道非吾行德無必貴遂以沒化豈命也夫某年月卒于官舍享年若干及喪至自蜀而墓不歸趙乃卜宅於許封樹汝墳子孫遂家亦既重世至開元中公之孫曰察以古諸侯之祿奉先大夫之祀晝遊本郡輝光前烈非清白以遺善慶之餘保艾爾後人亦何以臻此於是履霜爲感恭惟春秋之事刻石是圖俾揚祖宗之業斯善繼者也叙而志之銘曰

長史英英作爲世程動合雅度休有令名以之入官從事而允以之佐郡爲政孔明悠悠上天曷不貴德終于叅佐孰云邦國孝孫其昌餘慶乃彰家樹蒼蒼徽音不忘

故瀛州司馬叅軍李府君碑銘并序

君諱某字某趙郡房子人祖山壽齊尚書右外兵部郎中父仁瞻朝散大夫果州長史世德數載見于先碑公懿烈無忝雅其度量體和而韻緝之以絲性惋而文受之以采故好學不倦而墳典必精慮善以動而規矩皆中悉心存乎道義餘力見於文章人以美談日聞休譽弱冠舉進士調補同州叅軍換瀛州司

戶參軍以素所履以施有政居獲乎上往得其中無  
不嚴祗長史之所嘉歎無不崇讓同年之所厭服宜  
爾戩穀光昭令圖如顏子之不幸豈卜商之云命某  
年卒于官舍春秋若干公家世尚儉子孫是式初先  
大夫之喪也清白以遺而果無私積高標是營而庶  
有餘慶豈所謂不戀本達也無懷土以重遷不傷生  
仁也無困財以乏祀夫然趙之北際何必故鄉許之  
東偏亦云樂國故喪之歸也遂窆于斯及嗣子察受  
教義方能纂德業服事華髮潔身清朝天子方差擇  
其良惠恤于下由是解印少府部符本州衣繡而歸

雖榮之在晝重茵以立而悲不逮親結諸心形諸色  
孝子之志國人所稱於是乎歸美以揚先讓德以示  
後蓋承夷之義也得無述焉銘曰  
倬李侯世載德行時範言士則三英發百夫特肥而  
家華而國美而度命不融足方騁途斯窮子餘慶享  
次嵩我不訓藹遺風

後漢徵君徐君碣銘并序

後漢高士徐君諱穉字孺子南昌人也先生受天元  
休含道傑出生知而上貫之以一體資清純動適玄  
妙知道之將廢乃窮則獨善躬耕取資非力不食鄰

落所處率化無訟在漢之季遭時溷濁不抗迹以庇  
物故退棲山林不苟利以辱身故進無祿位五辟宰  
府四察孝廉文舉有道就拜太原太守皆辭疾不起  
延嘉二年尚書令陳蕃僕射南郡胡廣相與上疏極  
言先生宜爲輔弼協和人神漢桓帝猶能安車玄纁  
備禮徵聘而竟不屈志知時之不可久也然而諸公  
嘉招雖不之屑及聞薨卒徒步弔祭禮有所尚隻雞  
不薄意有所將生芻爲貴士之感義實衰世之有補  
仁而見德俾後生之可尋其廢中權行中慮皆此之  
類也昔者夷齊介潔而遠去沮溺野逸而離群顏闔

鑿坯以遁逃接輿狂歌而詭激此誠作者或類沽名  
夫有所不爲志則偏也無適不可用之極也先生則  
貶絕在心而經修於世純儉以存戒博愛以體仁應  
物以會通全已以歸正漢庭所以宗其德天下所以  
服其行豈與彼數子直逕庭而已哉靈帝初欲蒲輪  
聘會先生以疾終時年七十二有子曰季登篤行孝  
悌亦高尚不仕皇唐開元十五年予忝牧茲郡風流  
是仰在懸榻之後想見其人有表墓之儀豈孤此地  
則先生之德其可沒乎銘曰

靈芝無根醴泉無源角立傑出先生斯存英英先生

德不可名斯出無應鴻飛入冥道高事遠跡陳名邵  
勒石舊邦以觀其妙

故辰州瀘溪令趙公碣銘并序

有唐瀘溪令晉國趙君諱某字某終于其位嗚呼魯  
史既沒稱行者不在茲乎荀孟已來論命者亦何謂  
也放其言而無苟作合乃遷行其志而不迴與權必  
遂故道每屈於位身必後于時而猶守真不奪固窮  
自若立誠者既獨其所善尚德者徒隨而爲名名非  
欲彰以美實而自著位非欲下以屬守而遂卑此由  
命而然歟爲自我而然歟無代無之而今實續之矣

公大祖圩北齊河間通守因家于饒陽亦既重世今  
爲饒陽人也曾祖北齊幽州大總管大父隋鉅鹿大  
中正府君列考范陽令府君皆累行積慶以貽于後  
正性直道遂終於公公剛潔不群精明獨斷非義所  
在不以利汚名非禮所安不以跡傷教有立卓爾童  
非而然既學大成紛綸博綜將求祿養也而俯就鄉  
舉尋而明經登科補太子正字又改射洪尉皆以逮  
親自乞執政自哀遂屈換定襄尉公欣然而捧檄矣  
秩滿轉洪洞主簿永城丞時縣宰敗類公止之不可  
雖盡同官之心且急下人之病義形於色彼用我讐



此貪而無親難與心竟公剛亦不吐乃邁力爭迄用上聞因而坐免邑中黔庶莫不咨嗟求而得仁退則無愠矣乃返初服遨遊墳素精義致用清風被物或太守咨訪偃息自蕃或諸儒稽疑廢疾皆起是時中書侍郎河東薛元超人倫之表也將命河朔實舉廢滯企我休風延以殊禮立談體要大見嗟稱以故表聞其庶乎簡帝心會有陰忌之譖實爲無妄之禍矣進旣曾母致疑退而賈生投弔不無故也以此左遷瀘溪丞公竟不自列窮則體命雖在幽閤鬼神不欺苟推忠誠蠻貊何陋時縣無長史政則我由未歲月

而已成無谿谷而不悅五鄉自壽之子左言難曉之民翕然同辭乞爲父母於是詣闕投䟽至子再三朝廷尤之則受瀘溪令公事副誠請塙脩德化乃鄒魯設教而夷楚變風迨公遷殂闔境號慕古人遺愛何以加也遺令戒子留奕洛陽斯又不戀本達也有子曰璿歷官侍御史尚書郎洪州都督霜露旣變則感念以時陵谷有遷而音徽何代君子所懼于斯讓德銘曰趙侯之德好是正直令儀令則不回不忒寔邦之選彼夫之特玉堅而折膏明自煎辰陽于遠淑浦迴適下邑已矣君子殲旃遺令桐鄉歸魂崇芒瞻彼

有洛維水泱泱德音不已於斯揚揚

唐丞相曲江張先生文集卷之十二終

唐丞相曲江張先生文集

附錄

誥命

轉司勳員外郎敕

通直郎判尚書禮部員外郎張九齡温粹冲簡

虛懷朝議郎河南府法曹參軍袁暉清直雅正器

執物並富仁踐義崇德著言詞學高步於當時領袖

允彰於後進或早遊禮闈或久處神京甄其奏議可

序勳禮之籍九齡可守尚書司勳員外郎暉可行尚

書禮部員外郎散官各如故

開元八年四月七日

加朝散大夫誥

朝議郎行司勳員外郎護軍張九齡

右可朝散大夫

門下朝議郎中驍騎尉王昱等文臺效美書省推能  
句籍丹墀聲華紫帳或榮升儲館或政洽端僚畿甸  
揚芬京都課最咸逢朝慶式光通級可依前件主者  
施行

開元九年十月十四日

轉中書舍人敕

門下朝散大夫行尚書省司勳員外郎上柱國張九  
齡含章間出稟秀挺生學摠丘墳詞變風雅早應旌  
辟累踐清華行居四科之首才稱一臺之妙司言缺  
位側席求賢宜以起草之能式長如綸之命可中書  
舍人內供奉

開元十年二月十七日

加朝請大夫敕

朝散大夫中書舍人內供奉上柱國張九齡

右可朝請大夫如故

門下守朝散大夫中書舍人崔沔等並愷悌忠信士

林推重禮樂詞華掖垣高選郊禋上帝侍從圓丘宜  
增榮級俾承大慶可依前件主者施行

開元十一年五月二十八日

封曲江縣開國男食邑三百戶敕

朝請大夫中書舍人內供奉上柱國張九齡

右可封曲江縣開國男食邑三百戶

門下朝議大夫中書舍人上柱國上谷縣開國男竇  
泚等俱膺五等之榮俾光兩闈之寵可依前件主者  
施行

開元十二年正月十三日

加守中書舍人敕

門下朝請大夫中書舍人內供奉上柱國曲江縣開  
國男張九齡文含風雅道映簪裾朝請明大夫試給事  
中上柱國褚琇學摠古今詞兼典則或司言右掖綸  
綽戴華或叅議東垣駁正斯允便繁日久忠憤逾深  
宜章稱職之名俾加即真之命九齡可守中書舍人  
琇可守給事中散官勳封各如故

開元十二年十二月十三日

加中散大夫敕

朝請大夫中書舍人上柱國曲江縣開國男張九

齡

右可中散大夫勳封如故

門下太中大夫御史中丞內供奉上柱國蔣欽緒等咸以雅望並登朝列緝乎功績光我朝猷而有事岱宗侍升柴燎告成之典既展於封崇行慶之恩宜加於班序可依前件主者施行

開元十三年四月二十五日

轉太常少卿制

門下中書舍人上柱國曲江縣開國男張九齡夙擅能文早推強學清簡彰於莅職謹確著於立身掌誥禁垣是稱無對亞司宗禮時稱有歸宜參象河之任以光得人之美可中散大夫守太常少卿勳封如故主者施行

開元十三年十一月十六日

授冀州刺史制

中散大夫守太常少卿上柱國曲江縣開國男張九齡可持節冀州諸軍事冀州刺史散官如故

門下中武將軍前守左金吾衛將軍壽春縣開國男上柱國臣範等才幹卓立智術旁通從事昭於藝能效勞美於官政求瘼之重惟良是屬迭遷中外抑有

由江集才附錄  
四  
常規分牧黎丞咸膺俊選可依前件主者施行

開元十四年五月十四日

授洪州刺史制

門下中散大夫新除冀州刺史上柱國曲江縣開國男張九齡稟秀傑出含章挺生蔚文華以擅竒躬孝友以成德大中大夫前行尚書都官郎中上柱國始藏縣開國子李成裕體仁以善率禮以訓守官闕以獨茂履忠信而不騫皆人物表才聲方歸妙瞻彼江漢允藉仁明運協歌良之勤式應咨岳之重九齡可使持節都督洪州諸軍事守洪州刺史成裕可使持

節金州諸軍事守金州刺史散官勳封如故主者施行

開元十五年三月十三日

加中大夫制

中散大夫使持節都督洪州諸軍事守洪州刺史

上柱國曲江縣開國男張九齡

右可中大夫

門下朝議大夫守左散騎常侍崔沔等温良恭儉明允篤誠時懋乃官能有從政慶承大禮恩賜通班宜循舊章便增榮級可依前件主者施行

開元十八年四月初八日

轉授桂州刺史兼嶺南按察使制

門下中大夫守洪州刺史使持節都督洪州諸軍事  
上柱國曲江縣開國男張九齡雅有才幹兼達政理  
文孝著於四科忠信弘於十室豫章昔蒞見寶劍之  
衝天合浦今來見明珠之返水宜加優借之寵更委  
澄清之任可使持節都督桂州諸軍事守桂州刺史  
散官勳封如故仍充當管經略使兼嶺南道按察使  
攝御史中丞借紫金魚袋馳驛赴任主者施行

開元十八年七月三日

守秘書少監制

門下中大夫使持節都督桂州軍事守桂州刺史充  
當管經畧使兼嶺南道按察使攝御史中丞借紫金  
魚袋上柱國曲江縣開國男張九齡履行高厲令章  
挺生學究而精詞麗而則南宮留其奏草西掖籍其  
綸言自攬轡登塗下車按察五嶺德化而風美九臯  
聲遠而用聞足以式副虛求允諧僉屬書院綜緝必  
籍英儒蓬山典校是資宏達宜膺兼副之職俾叶文  
明之理可守秘書少監兼集賢院學士仍副知院事  
散官勳封如故

開元十九年三月七日

賜紫敕

敕中大夫守秘書少監集賢院學士副知院事上柱國曲江縣開國男張九齡先任桂州都督借紫金魚袋宜前件賜紫

開元二十年二月二十日

轉工部侍郎制

門下中大夫守秘書少監集賢院學士仍副知院事上柱國曲江縣開國男賜紫金魚袋張九齡識茂而遠體正而清行兼純一詞會夙雅密勿累年留心於

西垣澄清萬里樹聲於萬國秘室屬書甫流微婉之譽公車待詔稔聞忠讜之言更著論於會府仍獻納於高門可守尚書工部侍郎餘如故主者施行

開元二十年三月三日

知制誥敕

敕中大夫守尚書工部侍郎集賢院學士仍副知院事上柱國曲江縣開國男賜紫金魚袋張九齡宜知制誥

開元二十年八月二十日

加正議大夫制



門下中大夫守尚書工部侍郎集賢院學士兼知制  
誥上柱國曲江縣開國男賜紫金魚袋張九齡才識  
通茂藝能該洽或脩撰是兼應加獎命或公方克著  
隨所班秩昨汾陰展禮南面覃恩進等升榮抑惟常  
序可正議大夫行本官餘如故主者施行

開元二十一年閏三月八日

加檢校中書侍郎制

門下良才敏學允屬疇庸西掖中臺舊難其選正議  
大夫行尚書工部侍郎集賢院學士仍副知院事上  
柱國曲江縣開國男張九齡朝散大夫中書舍人集

賢院學士侍講陳希烈等先持風望夙推器識知名  
日久爲政必聞頃在詞司特推雅誥爰升侍講能識  
道文國經代教動多弘益而樞近之職擇人久矚奏  
議之地旌賢相望屬應朝典克厭朕心九齡可檢校  
中書侍郎希烈可檢校尚書工部侍郎如故

開元二十一年五月二十七日

起復拜相制詞

門下風雲之感必生賢佐廊廟之任爰在柱臣中大  
夫守京兆尹上護軍賜紫金魚袋裴耀卿合元精之  
休體度宏遠正議大夫前檢校中書侍郎集賢院學

士仍副知院事上柱國曲江縣開國男賜紫金魚袋  
張九齡挺生人之秀器識通明並風望素高人倫是  
仰可以叶彼寅亮當茲啓沃幹時待士旣資鼎實之  
和爲國急賢寧惟金革之事耀卿可黃門侍郎同中  
書門下平章事弘文館學士散官勳封如故九齡可  
起復中書侍郎同中書門下平章事兼脩國史餘如  
故主者施行

開元二十一年十二月十四日

加銀青光祿大夫中書令制

門下春秋之義尚重卿才王國克禎莫先相位用增

其命必正其名中大夫守黃門侍郎同中書門下平  
章事弘文館學士賜紫金魚袋上護軍裴耀卿正議  
大夫中書侍郎同中書門下平章事兼脩國史賜紫  
金魚袋上柱國曲江縣開國男張九齡經濟之才式  
是百辟正議大夫檢校黃門侍郎賜紫金魚袋上柱  
國李林甫泉源之智迪惟前人旣樞密載光而親賢  
稱首審能群會所蒞有孚寧惟是日疇咨固已多年  
歷選國鈞繫賴邦禮允清宜命鼎臣置之廊廟耀卿  
可銀青光祿大夫守中書侍郎九齡可銀青光祿大  
夫守中書令集賢院學士知院事脩國史勳封如故

林甫可銀青光祿大夫守禮部尚書同中書門下平章事三品勲如故主者施行

開元二十二年五月二十七日

都事 宜一

左司郎中 光

尚書左丞相金紫光祿大夫守尚書右丞相集賢院學士脩國史種國壽  
吏部尚書上柱國武都縣開國伯高  
朝請大夫檢校吏部侍郎上柱國豫  
吏部侍郎朝議大夫守尚書左丞賜紫金魚袋挺之

開元二十二年五月二十七日

銀青光祿大夫守中書集賢院學士知院事修國史上柱國曲江縣開國男臣張九齡  
中書侍郎朝議大夫中書舍人為供奉集賢院脩謨上柱國臣徐客奏  
銀青光祿大夫守侍中弘文館學士上柱國臣耀卿  
黃門侍郎朝請大夫給侍中內供奉臣昱言  
制書如右請奉  
制付外施行謹言

告銀青光祿大夫守中書令集賢院學士知院  
事兼脩國史上柱國曲江縣開國男張九齡請  
授

制書如右符到奉行

開元二十二年五月二十七日

主事

懷琛

郎中 懷琛

令史 王烈

書令史 姚元

銀青光祿大夫守中書令集賢院學士脩國史

上柱國曲江縣開國男張九齡開元二十三年

正月日在中書省考

右

御註詞云允釐大政財成物宜利器無前明心皆照

臨事能斷輸忠必盡况識貫今古思周變通寰宇八

安斯人是賴考中上

以前右丞相嵩奏准令京官三品以上考奏裁

臣等各得所由司牒報功狀如前

敕旨上考依註餘並中中

銀青光祿大夫守中書右丞相集賢院學士脩國史上柱國徐國公嵩奉

敕旨如右符到奉行

開元二十三年二月五日

尚書考功

銀青光祿大夫守中書令集賢院學士脩國史上柱國曲江縣開國男張九齡

牒奉

敕旨如右今以狀牒牒至准  
敕故牒

開元二十三年二月五日

令史 壽

加紫金光祿大夫制

門下功宣帝載大任所以寄賢道到時雍寵章所以  
褒德銀青光祿大夫中書令集賢院學士脩國史上  
柱國曲江縣開國男張九齡銀青光祿大夫守禮部  
尚書同中書門下三品上柱國李林甫並明識遠圖

資忠履孝自升樞近感竭至誠每於協契同心則詞  
上和氣讜言造膝則忠盡嘉謀既成開濟之美且多  
弘益之實屬禮展躬耕功參翼贊宜崇班秩之命式  
想勲庸之典並可金紫光祿大夫餘如故主者施行  
開元二十三年三月五日

封始興縣開國子食邑四百戶制

金紫光祿大夫中書令集賢院學士脩國史上柱  
國曲江縣開國男張九齡

右可進封始興縣開國子食邑四百戶

門下五等之制七命所崇苟非大賢孰延懋賞金紫

光祿大夫侍中弘文館學士裴耀卿等忠規亮節始終不渝或業盛台階且叶贊於三軍或才優國華咸允釐於庶績屬農祥展禮賦并頒恩宜膺誓河之典以紹景風之候可依前件主者施行

開元二十三年三月九日

金紫光祿大夫中書令脩國史始興縣開國子張九齡開元二十三年在中書省日

御註考詞云今之中書持我大政事之所制不以為難義之所在必談其奧乃心甚勤文章經國疇以為讓考中上

充右丞相制

門下燮理陰陽儀刑端揆自非人傑孰副僉諧金紫光祿大夫侍中弘文館學士上柱國稜山縣開國男裴耀卿才實國卿望為人範懷匪躬之節竭奉上之心金紫光祿大夫中書令集賢院學士脩國史上柱國始興縣開國子張九齡器識宏遠文詞博達負經緯之量有謀猷之能自冀贊台階彝倫攸叙直道之心彌固謇諤之操逾堅並可以儀範百僚緝熙庶績宜處掖垣之任得列官師之長耀卿可守尚書左丞相九齡可尚書右丞相散官勳封如故主者施行

開元二十四年十一月二十七日

金紫光祿大夫尚書右丞相上柱國始興縣開

國子張九齡開元二十四年在尚書省日

御註考詞云才稱命代道可濟時自乎弼亮刑於端  
揆可中上

赴荊州長史制

門下含弘光大是爲國體棄瑕錄用乃曰朝經金紫  
光祿大夫尚書右丞相上柱國始興縣開國子張九  
齡幸以才術特從任使台衡之地受寄以深端揆之  
職增榮亦至而不能乃心夙夜與進用旋慕近小人

虧於大德素所引用險詖遂彰令於繆官自貽  
可行荊州大都督府長史散官勳封如故即馳驛赴  
任主者施行

開元二十五年四月二十日

封始興縣伯制

金紫光祿大夫荊州大都督府長史上柱國始興  
縣開國子張九齡

右可封始興縣開國伯食邑五百戶

門下稽古丕訓封建諸侯所以褒崇有德爲國之屏  
金紫光祿大夫荊州大都督府長史上柱國始興縣

開國子張九齡宏才達識資忠履信或當樞近早有  
令聞或踐崇班每成政績自中及外旣文且武克懋  
厥猷不懈于位屬禮備徽稱覃恩庶僚宜加井邑之  
封永固山河之業率由典則貽爾子孫稅糧丁役一  
皆除免可依前件主者施行  
開元二十七年七月二十二日

贈司徒制

正大厦者柱石之力昌帝業者輔相之臣生則保其  
雄名歿乃稱其盛德飭終未允於人望加贈寔存乎  
國章故中書令張九齡維嶽降神濟川作相開元之  
際寅亮成功讜言定其社稷先覺合於著龜永懷賢  
弼可謂大臣竹帛猶存樵蘇必禁爰從八命之秩更  
進三台之位可贈司徒

按贈司徒舊史爲至德初上皇在蜀思九齡之先  
覺下詔云云仍遣使就韶州致祭新史云德宗建  
中元年賢九齡風烈贈司徒考之本紀玄宗以天  
寶十五年七月庚辰至蜀郡八月癸未朔赦天下  
癸巳靈武使至知太子即位丁酉稱上皇詔稱誥  
已亥臨軒冊肅宗自庚辰至已亥僅二十日且蒙  
塵之餘固無暇贈典神道碑但言發使至韶州弔



祭而已新史蓋據碑也其贈司徒當以建中爲正  
趙德麟雜錄云明皇在蜀每思張曲江則泪下遣  
使韶州祭之蕪齋貨帛以卹其家其誥刻白山屋  
壁下

唐故金紫光祿大夫中書令集賢院學士知院事脩  
國史尚書右丞相荊州大都督府長史贈太都督上  
柱國始興開國伯文獻張公碑銘

銀青光祿大夫廣州刺史兼御史大夫持節克嶺  
南節度度支鹽田五府經略觀察處置等使上柱

國會稽縣開國公徐浩誥

有唐旣受命在太宗時有若梁公房鄭公魏衛公李  
格于皇天在高宗時有若梁公狄格于上帝在中宗  
時有若平陽王敬漢陽王張扶陽王桓南陽王袁博  
陵王崔光復宗社在玄宗時有若梁公姚廣平公宋  
燕公始興公二張中興王業夫以天柱將傾大盜方  
起一振綱目再闡皇猷始興公爲之公諱九齡字子  
壽一名博物其先范陽方城人軒轅建國弦弧受氏  
良位爲帝師華才稱王佐或相韓五葉或佐漢七貂  
代有大賢時稱盛族四代祖諱守禮隋鍾離郡塗山  
令曾祖諱君政皇朝韶州別駕終于官舍因爲土著

姓大父諱子胄越州剡縣令烈考諱弘愈新州索盧  
丞贈太常卿廣州都督皆蘊德葆光力行未舉地積  
高而成嶽雲乂蓄而作霖是生我公蔚爲人傑弱不  
好弄七歲能文居太常府君憂柴毀骨立家庭甘樹  
數株連理王公方慶出牧廣州時年十三上書路左  
燕公過嶺一見文章並深提拂厚爲禮敬弱冠鄉試  
進士考功郎沈佺期尤所激揚一舉高第時有下等  
謗議上聞中書令李公當代詞宗詔令重試再拔其  
萃擢秘書省校書郎應道侔伊呂科對策第二等遷  
左拾遺封章直言不協時宰方屬辭病拂衣告歸太

夫人在堂承順左右孝養之至閭里化焉始興北嶺  
峭險巉絕大庾南谷坦然平易公乃獻狀詔委開通  
曾不浹時行可方執特拜左補闕尋除禮部司勳二  
員外郎加朝散大夫超中書舍人封曲江縣男轉大  
常少卿出爲冀州刺史以庭闈在遠表請罷官改洪  
州都督徙桂州都督攝御史中丞嶺南按察兼選補  
使黜免貪吏引伸正人任良登能亮賢勞事澤被膏  
雨令行祥風屬燕公薨落斯文將喪擢秘書少監集  
賢院學士副知院事時屬朋黨頗將排抵窮栖歲除  
深不得意渤海王武藝違我王命思絕其詞中書奏

章不愜上意命公改作援筆立成上甚嘉焉即拜尚書工部侍郎兼知制誥扈從北巡便祠后土命公撰赦對御爲文凡十三紙初無藁草上曰比以卿爲儒學之士不知有王佐之才今日得卿當以經術濟朕累歸養上深勉焉遷公弟九皋九章官近州里伏臘賜告給驛歸寧遷中書侍郎丁內憂中使慰問賜絹三百疋奔喪南歸祔塋先塋毀無圖生嗑不容粒白雀黃大號噪庭堊素鳩紫芝巢植廬隴孝之至者將有感乎旣卒哭復遣中使起公本官同中書門下平章事口敕敦喻不許爲辭聞命號咷使者逼迫及至

闕下懇請喪手詔有曰不有至孝誰能盡忠墨綬之義不行蒼生之望安在朕以非常用賢曷云常禮哀訴即宜斷表賜甲第一區御馬一疋尋遷中書令集賢學士知院事脩國史初公作相也奏差擇元戎皆取良吏不許入奏罷常奏諸軍兵省年支賜諛臣讒議事竟不行明年公奏籍田躬耕禮節加金紫光祿大夫進封始興伯每天長節公卿皆進衣服公上千秋金鑑錄五卷述帝王興衰以爲鑒戒公直氣鯁詞有死無二彰善癉惡見義不回范陽節度薛王奏前太子索甲二千領上極震怒謂其不臣願聞於公曰

子美父兵罪當咎况元良國本豈可動搖上因涕泣  
遂寢其奏武貴妃離間儲君將立其子使中謁者私  
於公曰若有廢也必將與焉公遂叱之曰宮闈之言  
何得輒出御史大夫李公尚隱大府卿裴袖先不禮  
中官皆忤上旨必在殊責公全庇焉幽州節度張守  
珪緣降兩蕃斬屈突干將拜侍中涼州節度牛仙客  
以省軍用將拜尚書並觸鱗固爭竟不奏詔平盧將  
安祿山入朝奏事見於廟堂以為必亂中原固請誅  
戮上曰卿無以王衍知石勒此何足言無何用兵為  
虜所敗張守珪請按軍令留中不行公諫曰穰苴出

軍必誅莊賈孫子行令亦斬宮嬪守珪所奏非虛祿  
山不當免死再三懇請上竟不從邊將蓋嘉運等上  
策密發將士襲平西戎公以為不可妄舉結後代讐  
非皇王之化也又不納及羯胡亂常大戎逆命玄宗  
追嘆曰公歿後不復聞忠謹言發中使至韶州吊祭  
其先見之明有如此者學究精義文叅微旨或有興  
託或有諷諫後之作者所宗仰焉上表論事多機密  
入皆削藁人莫得知常以致君堯舜齊名管樂行之  
在我何必古人由是去猶資格置採訪使收拔幽滯  
引進直言野無遺賢朝無缺政百揆時序庶工允釐

同儕見嫉內寵潛構譏公爲尚書右丞相初不介意  
居之坦然執憲者素公所効奏權臣豸冠得罪借  
以爲累貶荊州長史公三歲爲相萬邦底寧而善惡  
大分背憎者衆虞機密發投杼生疑百犬吠聲衆狙  
皆怒每讀韓非孤憤涕泣沾襟開元二十八年春請  
拜掃南歸五月七日遭疾薨於韶州曲江之私第享  
年六十三皇上震悼贈荊州大都督有司謚行文獻  
公越來歲孟冬塋於洪義里武臨原近於先塋禮也  
夫人桂陽郡夫人譚氏循州司馬府君誨之子也淑  
慎宜家齊莊刑國珮環有節纂組皆工幼作女儀長

爲內則太夫人樂在南國不欲北轅克勤奉養深得  
婦禮至德二年十月六日終於私第春秋七十有七  
同塋異穴卜兆從宜公仲第九臯宋襄廣三州刺史  
採訪節度經畧等使殿中監季弟九章溫吉曹等州  
刺史鴻臚卿腰金拖紫三虎爲榮立德行政二馮推  
美嗣子拯居喪以孝聞立身以行著陷在寇逆不受  
偽官及收復兩京特制拜朝散大夫太子右贊善大  
夫孫藏器河南府壽安尉永保先業克稟義方姪杭  
殿中侍御史文吏雅才清公賢操以兄拯早世姪藏  
器幼孤未建豐碑乃刻樂石用展猶子之慕庶揚世

父之美浩義深知已建以文章禮接同人惠兼甥舅  
薄枝効德無媿其辭銘曰  
鳳生丹穴鵬翥南溟天垂粹氣地發精靈傑生我公  
揚于王庭甫稱降神說表騎星學究經術文高宗匠  
再掌司言爰立作相忠義柱石謀猷帷帳王綱允釐  
帝采惟亮退居右揆出守南荆玄鶴緝翼青蠅營營  
不瞋猶視雖效如生昭昭令名千古作程

嶺南節度判官監察御史裏行仲舉建立 曾孫承

奉郎虔州文學敦慶勾當建立 墳塋在西北去此

三百四十有四步 曾姪孫鄉貢進士可復同勾當

立 玄孫鄉貢進士景新 玄孫鄉貢進士景重

歐陽公集古錄跋尾云右張九齡碑按唐書列傳

所載大節多同而時特小異傳云壽六十八而碑

云六十三傳自左補闕改司勳員外郎而碑云遷

禮部傳言張說卒召爲秘書少監集賢院學士知

院事碑云副知至後作相遷中書令始云知院事

其載張守珪請誅安祿山事傳云九齡判守珪狀

碑云守珪所請留中不行而公以狀諫然其爲語  
則畧同碑長慶中立而公薨在開元二十八年至  
長慶三年實八十四年所傳或有同異而至於年  
壽官爵其子孫宜不繆當以碑爲是也治平元年  
二月十日書

跋曲江文集後

夫文以氣為主塞天地沛滄溟  
浩然而獨存者也論者謂唐文  
有三變燕許無論已乃韓柳則  
造其極夫韓之文如諫佛骨驅  
鱷魚其庶幾乎以節義而槩諸  
柳則矐乎其後矣何者氣不三  
也先是而稱往者宜著其曲江

張文獻公乎公輕縑素練炳蔚在  
中至若金鑑一錄啟沃居多其視  
伊訓說命且厲行而共進之矣此  
非其參天地闡盛衰浩然而獨存  
者乎昔人謂公沒則唐室虛無人矣  
當其時狗社稷而後其身精忠勁  
節皜然與日月爭光功用彰彰  
何論文藻令公遠矣後之欲讀其

文而想見其人者其在斯乎其在斯  
乎舊集刻郡中久而湮漶間有欲  
新之而未逮也歲甲申金谿

如水王公持憲茲土公風度凝著文  
章德業益與文獻公氣味相投者  
迺謀諸孝洎二守秦君應驄欲新  
其梓以傳殆千載神會云孝不  
佞仰承德意而以其事董之曲江



令張君履祥為工既竣遂為之  
賜同進士出身中順大夫廣東韶州  
府知府前禮部主客司郎中晉  
安蔣思孝書

